

秋
蟪
吟
館
詩
鈔

秋蟪吟館詩鈔卷六

上元金和臣匏

南樓集

咸豐十年之閏三月金陵大營再潰不數
月而吳會賊蹤幾徧東南之旣於是乎極
余於其時盡室由江陰渡江一寓於靖江
再寓於如皋又渡吳淞江取道滬上然後
航海至粵東止焉初佐陸子岷鍾江大令
於端廣二郡子岷逝世遂佐長白鳳安五
林觀察潮州前後七八年間凡若簿書期

會之煩刑獄權算之瑣推埋烽燧之警侏
儻責讓之擾俱於幕府焉責之感在知己
所不敢辭則日已昃而未食雞數鳴而後
寢者蓋往往有焉文章之事東之高閣而
已然猶以其聞見所及製爲粵風粵雅二
百餘篇又先後懷人詩七十章草稿皆在
牘背未遑掇拾丁卯東歸之前數日家人
輩以爲皆廢牘也而拉雜摧燒之於藏拙
之義甚當而歌泣已渺不可追然則祖龍
之燄虐矣顧任生遊迹以粵東爲至遠屐

齒之所及未可廢也其未至粵以前及在
粵餘詩敗鱗殘爪間有存者輒復寫之爲

南樓集

將避兵之江北感賦

十年離亂久已似不知兵賊熾乃今日吾行亦

北征皇天雪何意

閏三月十五日立夏大雨雪以風鍾山大營燄火皆反擊

遂立

上將敗無名

張殿臣副帥孤軍保丹陽諸將無援者戰失利竟死之

滿目皆餘燼連江一哭聲

渡江

柴門回首即天涯暮雨霏微去旆斜六郡鼓鼙

誰逐賊十年書劍幾傾家夜深雞警連江火春
盡鶻悲滿地花此岸即今行不得驚魂何處定

風沙

江干無賴子弟假運賊名呵
禁行客推埋剽掠無地無之

此鄉

何處桃源許問津此鄉草草寄吟身
瞋魚有意不容物羞菜無言常畏人行客
漫勞談姓字窮途敢信仗交親
可憐忍盡唐衢淚尙費金錢幾
買鄰

殺運

殺運至此極天甯不好生有時能悔禍
誰謂竟

如醒所望人心古天心怒一平諸君倘厭亂方
寸試重耕

小草

牆陰小草古無名瑟瑟黃花入夏晴曾有何人
問開落雨恩風怨自平生

自嘲

觸熱頻干渴睡人煩聲誰聽止逢曠平生冷笑
癡蠅慣頭白何知一效顰

夜泊斜橋

小泊橫江口長年醉不行稻花秋影合蘆葉晚

涼生風在煙無力潮來月有聲鄰船齊夜話鄉
語獨分明

秋暮聞蟬

滿地秋心獨自悲一蟬遙在最高枝此君差勝
歸飛燕尙與愁人話片時

感事

千里聲聞競鼓鼙諸公麟閣有階梯大官青鬢
垂貂尾長路黃金壓馬蹠儘許起家如海闊相
期殺賊與山齊誰知士雅平生志止出南塘不
聽雞

閒居八韻

時事艱難日虛生愧腐儒閒居乃吾分敢復泣
窮途所苦調飢甚年豐米似珠吹簫瀆人聽可
叩一門無況與鳩分拙未能從釣屠平生識字
誤搖落此江湖豈乏諸同學金多客氣麤妻孥
終實識方笑僕非夫

客味

荒江秋盡雨風頻鴻雁聲酸客味辛婦毀笄衿
憂世亂兒辭梨栗識家貧今年多病寒偏早盡
夜常醒老漸真天遣餘生成酷罰絕交書敢怨

時人

不寐

油燈漸放月華明涼夕遲眠又五更冷眼電張
憐鼠技壯心灰冷怯雞聲寄生始信錢爲命惜
死甘辭酒不名一事未全忘結習枕邊時喜小
詩成

自我

自我經離亂途窮未盡窮即今飢欲死歌哭漸
無功有未絕交者相憐病乃同春風滿江海何
處止飄蓬

陸子岷

鍾江

書來招遊粵東感賦

許我浮家去何辭萬里遊從來滄海水有意渡
閒鷗止自驚衰朽交情未易酬尺書珍重語時
輩讀應羞

史秋舫

寶田

亦附書勸行即題其後

勸作南飛鶴深交骨肉看從今寄生死不但策
飢寒燈下全家感天涯此語難年來雙眼淚今
夕爲君乾

贈嘉興張龍門

以莊

秀才

湖海聞名久相逢今路歧有家同梗泛無淚爲

花垂竟不窮，愁死都非少。壯時飢鷗易爲飽，心事鬢毛知。

與孫徵之

文川

話別揚州

塵土飄零久，勞勞共此生。艱難得歡聚，離亂見交情。春色自桃柳，此鄉無燕鶯。南枝余有夢，明日別君行。

如皋遇陳月舟

鑑

上舍即以贈別四首

如我長貧賤，生來毛羽單。中年更平聲喪亂，無地避飢寒。君以多財重，時方熱眼看。何期生意盡，晨夕大艱難。

昔所解推者原難責報深但論天位置未免太
寒心斗水留餘潤能償淚滿襟誰憐捫蝨手曾
散萬黃金

豈爲嵇生懶臣髡更雄鬼神怒我輩罰以兩
奇窮要是酒徒病他無媿可攻腰纏十萬貫何
事福諸公

至竟歸何處甯無續命湯鬢絲看日甚妻子劇
悲涼一飽憑孤注相期萬里長

時君將北上余亦有粵東之行

壯心如此盡歧路幾商量

秋柳

幾夕金風戰綠楊垂垂病葉已全黃憐渠未到
飄零甚猶爲旁人障夕陽

將之粵東留別江南諸友

江南殘郡尙千里我立絕無盈尺階年來乞食
牛馬走輓腳踏碎雙芒屨故人笑聲達戶外破
刺不敢輕出懷平生雖有縞紵雅高門詎納枯
形骸固由世亂生計薄一錢流潤如江淮諸君
心學亦銳進孟平往往初念乖豈無二三交耐
久大氏貧賤吾之儕風雨尙頗通問訊但言槩
境無一佳其中不才我尤甚眼昏淚熱誰爲揩

四顧茫茫眇長策方寸一簸當風徒儻竟忍死
作株守六尺靜聽天安排奈我於世太齟齬天
欲福我無根荻縱令學詔自今日甘以冠劍爲
裙釵蛾眉雜進方萬輩只恐舞袖邯鄲差借何
論腐儒習氣重頰面未免留斤厓狂名偶然入
人耳怪物所至譙訶皆此從何處得轉計乃期
好夢來青槐徒馴野性同鍛鶴敢憑客氣師怒
蛙十日九飯常不飽妻子瘦削成羣豺老夫壯
心既灰死更苦秋病痔癘痰邇來龍鍾骨一束
羣兒姍笑慙優俳隔江烽燧況屢警吟魂終恐

驚沙埋忽從天外落奇想寄聲遠至南海涯陸
郎官好儻憐我此君古道追黃媧果然命我挾
瑟往食指並許全家偕譬諸九死奉赦紙字字
如聽鸞鳳喞亦知萬里道奇險身命本來籬寄
蝸西人之舟發以火破浪差勝桴與薄此行孤
注仗一擲故鄉難戀好非鮭所惜良友分趙燕
何時更叩花前柴臨歧莫餉一甌酒蘇晉久已
眞長齋以後相思累晨夕海鼇忙殺傳詩牌蛤
蜊我非知味者風情寧向珠江娃或如嵇含草
木狀別寄一卷書齊諧

舟中見燐有作

江湖滿地賸干戈，處處青燐照綠蘿。
不信夜臺如許火，十年新鬼比人多。

守風海門之圩角港

吾命飢驅老，今爲萬里行。
十年鄉國夢，一夜海潮聲。
亂世人風駁，孱身客路生。
石尤真惡劇，秋冷更無情。

吳淞訪友

秋雨吳江訪，故知白楊新。
冢已纍纍九，泉插腳應安穩。
不似人間有亂離。

由吳淞江易舟渡黃歇浦至上海

六年前飲吳江水重與妻兒到此鄉全局江南
餘片土幾家海市破天荒儘償石尉珊三尺誰
乞東方粟一囊同是豪華四公子春申君本最
尋常

上海晤徐生談近事感而有作

漫憑如願夢封侯徐福今歸海上舟風月蜃樓
無管東干戈蟻穴有恩讐銀河水色添紅淚珠
樹花枝照白頭我已年來愁萬斛不堪此夕爲
伊愁

到廣州口號

辛酉臘月由上海航海至粵時上海又告警矣

劫火江湖徧桃源何處鄰此行方奪命吾意獨
憂貧飯稻彌天賤衣棉閱歲新若論溫飽事合
作嶺南人

廣州除夕

金尊孤負荔枝香對酒先傾淚萬行佳節底干
孤客事逢人偏要道勝常

壬戌清明作

夢逐揚州舊雁羣

去年清明余在揚州

孤飛聲影斷知聞

紙窗過雨日猶溼塵榻無花藥自熏春盡我逢

垂死病海濱誰買送窮文
旅巢不及播間甚多

謝唐君義薄雲

時余遘病卧逆旅中同鄉人無過問者惟新交香山唐君應星

獨一臨視且贈藥賞可感也

余既至粵陸子岷方任高明高明客民與

土戶鬩七年未罷子岷治軍江上余未

遽赴而家屬與余先後發上海者亦久

未至不得留會城待之窮病獨居人

境愴絕四首

等閒鳩鵲志喧爭七載居然不解兵
且莫事從

公是斷大都人視

國威輕蠻州每苦絲多亂

鳧令方欣鐵有聲我愧鉛刀鋒鈍絕避器酣睡
在春城

帆檣日日集如林底我移家直到今蛩負交情

甯左計

孫澄之居上海久余以家人附西人舟事託之越百餘日未至

狐疑魂

夢欲東尋甌吳兵火連天遠壺嶠風波弔地深
料得身經滄海者應憐擔盡一春心

百花紅樹滿城春萬里青天半死身海上釣鰲
寧有路門前題鳳更無人淚多醫不名何病金
盡奴先變上賓偶一舉頭開睡眼山靈誰似我

眉顰

鬚眉羞向鏡中看想見年時相更寒客氣盡銷
生事少土音太差去聲解人難問名止敢稱雞肋
求食常防遇馬肝學賣癡獸似吳下叟中都作
十分歡

病甚不寐鄰寓楚客數輩夜有戲爲挽歌
者哀苦動人悽然成詠

客或歌蒿里悲風生一庭茫茫九泉鬼此淚爲
誰零月夕想殘醉人生感化萍何知老夫病獨
對短燈聽

近況

近況不可說總之前日非路窮貪海遠身老聽
春歸多病憶家切長貧入市稀從來無客過不
用掩松扉

四月十一日家屬至粵三首

一家來喜甚乍見淚如潮隔歲別非久天涯魂
屢消居聞寇氛惡行慮海風驕今夕共燈火餘
生止倖邀

我病好將息顏唐不至斯只今身未健何事汝
來遲捕蝨衣誰浣劄蛙竈自炊此時憶家苦白
髮暗中知

盡室依人慣艱難到此行此行今已定所賴古
交情我豈有他望天寧不厭兵何當生計遂歸
買故山耕

史秋舫自佛山來會城見訪即送歸楚兼

呈長沙楊蓬海

恩壽

明經三首

意外逢君一說愁銜杯難禁淚交流八千里外
病垂死十二年來兵未休亂世詞人原腐鼠全
家滄海伴飢鷗生平鐵骨歸何用天遣勞薪早
白頭

鍛鸞如我愧虛生市駿期君振大名吏隱可從

爲屈宋家聲相望在蓬瀛頻年歌哭雖同調歷
劫文章更老成滿目青雲前路是他時車笠見
交情

一枕潮聲又別離明朝啖荔各相思亦知天許
夢中見未免人添去後悲努力秋風慰慈母傷
心冬氣入吾詩此行再遇楊夫子爲道江淹才
盡時

君自楚來粵時蓬海明經聞余
入粵極致傾慕之意余甚愧之

廣州城夜望

萬里天涯古越裳雲容莽莽日荒荒幾家王霸
皆孤注末路河山每後亡海外有田三稻熟春

前無雪百花香我來不爲歸裝富回首煙塵滿
故鄉

高明道中

萬頃新秧一翦齊鱗鱗綠水養紅泥此中多少
冤禽血芳草無言落日低

時土客相鬪之
兵退不逾月

漫成

敢言筆札似君卿苦海文章得失輕一事南來
差可喜漸無人說舊才名

縣齋坐雨

一夜雨未止居人歡若雷海濱農事早此雨及

時來尺土我無有從誰笑口開料應江水闊
日打舟回

珠江夜歸

船前船後榕花飛雙槳打潮潮滿衣十五盈盈

柳條女夜深風露送人歸

粵人呼垂髻女
郎曰柳條仔

去年之赴粵東也遣嫁祇女而行今年閏

八月因事暫歸江南祇女家數日復將

還粵言別四首

昔之與汝別不敢說歸期何意首重聚一年今
未遲路經海外險人較去時衰翦燭深深話歡

顏豈敵悲

喜汝爲新婦賢聲徧里閭家風習貧賤顏色似
當初汝母苦憶汝亦如汝憶渠得余親問訊勝
寄百回書

欲說不忍說我先知汝心心傷我中歲百病底
相侵所望加餐飯何時返舊林要看天位置答
汝費沈吟

南還方甚急萬里海風催此見本意外我行姑
勿哀但期兵火息雲日一時開夢裏家山在寧
知不再來

倚裝再別祇女

歸鞍未冷又征鞍，老淚如泉感百端。
翻悔此行多一見，今年別較去年難。

閏八月十四夜崇明海口阻風

身自炎荒至，渾忘吳楚秋。
遙天一鴈過，涼信落孤舟。
天上幾明月，故鄉今客遊。
誰憐衰病骨，萬里逐閒鷗。

過倚孃故居

前事不可說，今來且看山。
老餘詩筆健，病放酒杯閒。
花落蝶何往，池通潮又還。
茫茫兩心事，一

樣在人間

借舫坐月

借舫者高明區氏園也時借子岷校歲試卷居此

香溫茶熟此清宵暫可消愁且共消蝶大於衣
爲橘繭水濃如酒是椰瓢月華夜久壓人重花
氣春深闌路驕止少舊時攜手伴最高樓上一
枝簫

黃牡丹奉和居珏夫人

茗華入道孕仙根儷白俳紅各斷魂塵土別饒
春色豔綺羅同讓國香尊應憐霜圃秋花瘦每
認瑤臺夜月昏何似玉妃初病起薄施梳洗倚

宮門

廣州晤同鄉吳九帆湘明經出詩稿見示

奉題

南來尤寂寂獨客敢論文况以傷心甚頽唐已
十分與君數晨夕吾意亦多欣一片寒陵石相
看仍舊羣

冬柳四首和吳九帆

曾是長條踈地垂歲寒消息斷聞知冰霜浩劫
延眉嫵湖海新愁上鬢絲蟬噤本無負翳葉鴉
枵窻在舊棲枝謝孃較我還癡甚雪下詩情尙

爲伊

幾輩停杯話綠陰當時我最識卿深瘦腰學舞
羞當世傲骨支撐直到今偶對征鞭惟冷眼盡
隨樵斧儻甘心染衣久已無情緒葛幘人誰覓
賞音

記得江南長短亭笛聲常在別離聽況拋金縷
都埋土誰向冰天肯種星未死秋心應更苦再
來春色不堪青風流如此成銷歇每見朱樓老
淚零

移根我亦懺閒情陶令柴門掩不成萬里霜留

疲馬迹一年風賸病鶯聲南枝幸傍梅花熱小
草重逢臘鼓鳴回首江干同命樹獨貪寒趣愧
餘生

花地舟次遇青溪舊人阿蓋

天涯誰顧曲衆裏自嫌身大海難爲水孤花不
算春鄉音吾獨喜客路汝尤貧話到傷心處埋
香又幾人

謁黃老相公祠

黃名安字定公別號石齋
上元人明季諸生屢試不

第走京師上書仍不遇最後佐湖陽令某
君幕府崇禎甲申思宗殉國難事聞先生
痛哭赴井死土人就井填土爲冢立
龕祀之稱黃老相公祠有禱輒應

舊家同傍胭脂井兒女悲歡徒齒冷今來古井
弔遺忠泰山豈與鴻毛等遺忠者誰黃先生少
年獨步江東名學書學劍兩無用鞭馬一誓天
上行天上何人虛左待威鳳無輝鳥振采買山
還仗賣文錢了了萍蹤落湖海潮陽令君方南
來先生雄心老未灰替人小試種花手陽春所
至歡如雷是時神州已多事忽報京師賊大熾
小草猶懸奉日心冤禽頓下思君淚先生痛哭
評高皇子孫乃以仁柔亡區區李闖亦毛賊誰
令十載滔天狂一戰尙能憑熱血欲刃仇讐手

無鐵王侯幾輩已生降日黑天昏對誰說吾儕
若復惜此身再活百歲寧爲人清流十尺自埋
骨殉君何必君之臣先生入井二百載井水雖
枯井不改試開胥土與招魂儻有遺書心史在
井水況有重來時味甘百倍今可知男兒意氣
苦不重我汲此水一飲之

甲子四月十七日五林觀察招祀楊忠愍
公生日於西園以坐客姓爲韻分得馬
字

男兒不逢辰墮地泣聲啞塵網惡趣多身後名

乃假我讀公年譜憂患中人也生平值初度受
客賀必寡當朝有巨奸方傳百年學達官作兒
孫舞綵集華廈鞠脰紛上壽罔惜折腰髀前席
盈千金一開笑口哆苞苴物何來膏髓竭天下
維公久震怒至性含石瓦一朝踞九闈白簡獨
力寫義憤太學陳痛哭少年賈此奸若竟鋤萬
歲聖人嘏斯民如更生童叟慶於舍借豈但臣
一人竊祿齒加馬不幸帝聽充謂金敢躍治賜
杖毒臣躬肉落毛髮捲囹圄待命久終以碧血
灑臣之上書始肝膈早傾瀉不與奸俱生臣非

畏死者一死雖鴻毛如火蛾自惹過去三百年
生氣彌天且苟有血性人孰不淚盈把燕寢幸
無事偷閒課銷夏借以公懸弧期私祭比扮社
知公儉食單櫻筍代脯鮓辦香上干雲垂虹燭
雙炮敬陳短長吟當誦梵般若公魂倘可招未
用極垓野抑公再生天慎炙命宮輒守愚易老
壽尚直斯病痕甯書絳亥字頭白汗顏赭毋爲
孟陬屈騷音附小雅

楊妃生日詩四首

連理雙飛誓後身漫從天寶說生辰三郎自有

言一
千秋節不是今生共命人

爲想驪宮倒玉尊
年年避暑有新恩
一家生日無人管
冷落梅精最斷魂

自歸南內淚痕多
未必斯辰忍按歌
惟有羅衣揮手日
荔枝應祭馬嵬坡

是否花魂死尙癡
五雲深處最相思
不知鈿盒傳言後
再降人寰是幾時

殺虎行爲香山徐生作

虎能食人人畏虎
人能殺虎虎不武
虎乎虎乎汝何來
乃以我爲東道主
前村一牛後村豚
萬

口同聲一時怒怒而不殺我不然汝若再來我
殺汝相虎來路當路心掘爲一阱似井深磨刀
三尺鐵可入夜夜持刀阱前立當虎十日未來
時衆心疑虎能先知或勸罷休意弗許虎若不
來我不去明夜月黑雲磐磐天昏夜曠魚更闌
狂嘯一聲虎來矣人方假寐立驚起持刀覓虎
學虎聲虎忽落阱如山傾便從阱上窺阱下虎
鬚戟張口箕哆見人一躍與阱齊人刀直前虎
面犁平明繫虎虎不動權之凡五百斤重從此
歡聲徧里鄰宵深露坐情話親一虎既殺百虎

退童稚無譁雞犬馴乃知此本無難事人生勇
怯分越秦君不見香海海濱殺虎虺虎不食人
今畏人

和鳳五林觀察潮州民團報成閱伍元韻

二首

舉旗萬家舞借箸一時籌好勇根天性從公急
國仇先聲寒賊膽眾志叶神謀我最驚禽憤
今都釋杞憂

我公羊酒犒兵政更嚴明日與戈常照潮因弩
不生此軍寧有敵彼賊况虛聲試聽金鐃奏

恩綸下鳳城

乙丑十二月二十一日左恪靖伯誅髮逆

僞康王汪海洋於嘉應州城下收復郡
城髮逆至是始滅饒歌四首

上將威名古范韓先聲到處賊心寒
雄師十萬長圍日早識窮魚漏網難

當時賊騎走湖湘幸賊哀憐此故鄉

髮逆中粵東之人多

於粵西初自粵西逸出時直走楚南固謂其不擾粵東也何意江東潰圍出

一心來作嶺南王

鼓鼙閩嶠軍容墨樓櫓潯江戰血紅
此日程鄉

一星火居然降將是元功

是日汪逆單騎出嘉應城有降人丁某識

之走報大帥帥命萬人隨丁所指合圍而槍擊之良久始殪

盜弄潢池亦偶然誰令此賊勢滔天可憐拳大跳梁鼠也歷三朝十五年

和張壽荃

銑

觀察西園漫興五首

公自田間至今爲海上霖神功方潤物佳興偶依林榕老溢生趣蕉虛證道心此中忘世慮得意且高吟

幽禽逐人耳對語各忘機坐處憐荷靜行時妬蘚肥閒情風皺水結習雨黏衣醒眼覓真樂翻

嫌蝶夢非

夕園誰卜築嘉植惜多疏公以陽春手來翻種
樹書歲寒三益補榛穢一時鋤他日清陰滿栽
培力豈虛

吾黨二三子時從脫帽遊暮春此童冠韓水古
風流舊價慙非駿餘生幸有鳩自憐秋氣重不
敢賦登樓

若論公幹濟林壑意何欣海國多盤錯神君重
溺焚同仁無害馬斬亂亦慈雲招隱原餘事方
宣繡斧勤

丁卯之春將歸金陵余今年五十矣作詩

自訟兼以留別四首

昔年鄉井苦干戈滄海長征弔尉佗有命全家
爲幸草不才平地幾驚波一身老去思歸久萬
里南來得病多到此男兒知世味干雲意氣劇
消磨

天許韓山放酒杯寒時幾度遇春回執鞭方感
羊公逝擁篲重逢鮑叔來龍是畫中盜俊物桐
經爨後乃焦材訓知所愧初心負綵筆無花劍
有苔

七年噉荔客仍饑何事空裝嶺外歸驥志尙存
姑北望鳥音無改莫東飛孤懷違俗水投石結
習累人花著衣傾海不堪書罪狀吳儂何日始
知非

孤注難憑是此行燼灰休仗舊才名高樓我敢
矜湖海大厦今誰數孟平痛哭文章歸老境亂
離身世信虛生寄言青眼高歌者翁子餘年少
宦情

拜鳳光祿祠告歸三首

我初在門下碌碌了無奇何意古愚疾翻叨國

士知平生此意氣湖海幾瑕疵頭白炎荒外公
前一吐之

公才大於海焉用堅儒爲止以虛師竹常如決
待著忘形捫蝨處補過聽雞時報稱夫何有一
心惟不欺

大星落地後吾道一時非曲少鍾期識春催杜
宇歸千秋公竟往四海客無依峴首碑前拜傷
心淚滿衣

鍾姬雲如澄海舊家女也流寓郡城年十
五矣其母將嫁之而姬志在余遂挈之

東歸喜賦八首

爲誰擔盡一春愁
好事如今啖蔗頭
奪得胭脂山到手
書生眞不讓封侯

白壁微瑕衆鑠拚
才名埽地筆頭乾
千金三致尋常事
止有佳人再得難

三五韶華肯錯過
停裝解劍贖青蛾
遙遙十載湖州約
至竟司勛薄倖多

自是因緣證夙生
癡人作夢苦蠅營
風姨費盡橫吹力
花骨錚錚鐵鑄成

玉鏡臺前喜萬千
傾心翻爲雪盈顛
此君雙眼

青於電誤盡羣兒是少年

萬里家山歸有時江南煙水夢先知
芳魂癡過吟魂甚直爲多情死不辭

花下雙攜月下扶人間豔福勝蓬壺
生生世世

爲兄弟許仗慈悲佛力無

姬來以四月八日

此行嶺海計仍非儀舌雖存朔腹饑
一事傲人

歌得寶片雲紅簇布帆歸

春夜

雨絲無力夜深晴一片春寒紙樣輕
明月上牀人夢醒隔窗似有落花聲

秋蟬吟館詩鈔卷六終

秋蟪吟館詩鈔卷七

上元金和亞匏

奇零集

余於丁卯夏由粵東之潮州航海東歸既
過春申江行未至金陵遘疾幾殆至戊辰
冬始以家屬旋里劫灰滿地衰病索居懷
刺生毛閱四五年竟無投處癸酉之歲出
門求食雖間有憐而收之者而舊時竿木
鮑老郎當大抵墨突未黔楚醴已徹十餘
年中來往吳會九耕三儉斲免寒餓而已

生趣既盡詩懷亦孤而自與夫已氏文字
構衅以來既力持作詩之戒又以行李所
至習見時流壇坫尤不敢居知詩之名即
或結習未忘偶有所作要之變宮變徵絕
無家法正如山中白雲止自怡悅未可贈
人乃知窮而後工古人自有詩福大雅之
林非余望也顧吾友丹陽東季符大令數
數來問詩橐謂余詩他日必有知者兒輩
亦以葺詩爲請余未忍峻拒因檢丁卯至
乙酉諸詩雖甚寥寥猶彙寫之爲奇零集

余已年垂七十其或天假之年鬢絲未盡
此後亦不再編他集矣

還金陵口號

遠遊金粟海重入石頭城
賸水殘山裏吾廬芳草橫
故鄉翻作客親舊幾歡迎
未死屬天幸此來如再生

題陳月舟移花醒酒圖

此園盛時我買鄰頻來
風月無主賓名花四圍
蝶同夢小飲百杯龍未馴
江水東來急鼙鼓劫火一炬成煙塵
此園何幸萬分一拳山勺水存

其真主人今之補天手蒼生霖雨無其時入山
且爲花請命意所不可酒下之餘年如我老尙
在去家萬里歸稍遲愛花亦與君同癖多病獨
吟止酒詩

上湘鄉曾侯六十韻即送移節幾輔

諸葛兵猶短汾陽學未聞公才邁前古時事值
多紛大老生名世中興佐 聖君鳳池標峻望
麟閣樹奇勳昔在辛壬歲初騰嶺嶠氛跳梁原
疥癬流毒乃垓垠吾土它爲窟斯民机與窘負
嶠狂耽耽蔽日黯翁翁豈不聞專寄其如絲屢

焚登壇聲嘆借箸策紛紜戎政皆兒戲 天
威少一軍十三年甚熾億萬姓如醺公本廬居
起言訓 旻食廩義聲沸湘水壯志鑠衡雲獵
獵露馳檄隆隆雷合鼓同心盟虎旅示掌數螺
紋塵掃江之表星周斗所分上流清漢滙東略
指淮瀆以次鏡歌聽都如幕府云建瓴從隼擊
遊釜想魚癭仲氏承家教金陵掩賊羣宵圍眠
錡盾晨鮑浙交穰囊當胸餘智方良手不輟陣
圖雄背水戈影銳停曛上將身包膽千夫齒齧
齧蟣從重甲浣鳥始老巢焚捷奏 皇居燕歡

呼海甸麋弟兄各鐘鼎部曲亦圭纁既厭天心
亂還煩國手憲過江方駐馬失路盡哀猿罪豁
網三面賞蠲金百斤翦荆諷井里貸粟勸耕耘
幾輩賓歸雀多方市聚蟲舊城童拾芋新社叟
移扮春相排梁廡機燈會楚妘醉人冬有瑞行
客夜無猿齊轂通梅驛吳舫泛錦雯於時嚴禍
首隨事息勞筋暇日噓寒谷諸生集大昕談經
圍馬帳問字贈羊裙鴻製勸劉賈鳩工羅典墳
俗皆敦翰墨器自判猶薰凡此燼餘潤胥由盛
德熏慈雲垂藹藹甘雨沛雰雰愠得南風解光

依愛日忻頻年費調護元氣漸氤氳 帝命還
朝切人宜借寇殷定知元相度藉鎮北方葦
功況資匡弼謨尤協侃閭待賡温室樹廣植眾
生芸賤子材懸瓠閒身冷抱篋學書雖擬朔下
第敢居蕢一自南流粵長爲乞食員仄聞篋筆
瘁私矢執鞭欣竟曳龍門履時沾燕寢芬繁才
窺管樂醴理飫河汾色泯齊桓侈箴傳衛武勤
斗山肅瞻仰葑菲感慙懃門外今攀柳車前孰
獻芹南豐香永爇竈奏愧無文

己巳九月蔡紫函琳刑部乞病歸里卒於

清江舟次哭賦三首

舊交零落幾黃泉此信驚傳倍黯然早計歸期

重九外何知死別十年前

前數日書來尙有一樽洗塵黃花未歇之

語而余自咸豐十年在江陰送君入都後遂不復見今十年矣萍絲家口惟三

兩棘刺秋心每萬千自有人生難說處不關貧

病與烽煙

北來賓雁路偏長一病渾無續命方自爲藿鹽

傷德耀誰教香火絕中郎

君仇儷篤甚婦杜孺人先君數月卒而君

病乃劇杜孺人無所出太夫人屢欲爲君置筴而不果至是白頭雙柩弔者惻然班留

青瑣如春夢身過黃河是故鄉從此風流盡銷

歇只應傳世在文章

聞遺橐甚多太夫人尚慎藏之

著作有才成寂寞科名無力止
嗚號窮魚幾輩逢風雨健鶴孤飛
惜羽毛自古人文關世運只
今天意厭吾曹白頭如此仍湖海
不及先生一死高

癸酉人日立春

人日春歸日驚心二十年

甲寅亦人日立春余時避亂全椒有詩

乾坤身僅在湖海鬢蕭然煮字有雙玉
買山無一錢餘生未來事不敢問蒼天

出門示兩兒

名心灰冷宦情虛嶺海歸來感索居一事未成
身已老七年多病客常疏門前誰更來題鳳江
上今仍去券驢差幸束裝原草草隨身還是舊
琴書

傷春心事與誰知衣狗雲情變幻時敢信登場
非鮑老從來識曲要鍾期舉棋不定先欺敵說
病雖真又忌醫壯不如人衰更甚畫眉何處合
時宜

冷面盜逢熱眼看此行何苦累猪肝身經湖海
狂名重心切飢寒直道難春夢易醒惟涕淚家

書頻寄祇平安兒曹努力從今日莫似餘生缺
屢彈

寄雲如

昨別無言強自支回頭事事費相思吟聲鬢影
周旋久昔在家時兩不知

獨客無家慘不歡些些眠食稱心難中庭月落
參橫後誰忍春寒擣藥丸

夜闌身似紫薇花絕憶麻姑癢處搗料得自籠
紅袖看近來蔥管又長些

相如渴病久難消一粟紅燈盡夜挑倦眼不堪

人意冷爐煙還是自家燒

騷人老去無邊幅羅袂蓉襟半沓拖幾日無人
管鍼線青衫破落淚痕多

一點靈犀最有神年時春夢事都真者回夢到

東頭海看我孤衾夢底人

姬潮人底人
潮言誰也

最怯春初夜雨零惺忪小膽泥人醒如今三尺
梨花枕軋軋雷車止獨聽

絮甲花鬚繡獨能一雙秋水恐難勝玉牀盡日
低頭可不要穿鍼到上燈

燕語鶯啼繞綠陰春風來去莫關心舊愁已是

深如海再著新愁海更深

太貪風露砭肌寒多食瓜梨積胃酸牢記別時
珍重語但身無恙我心安

月明夜夜上高樓江北江南各淚流詩卷我猶
餘結習問卿何處最銷愁

讀諸院司判牘書尾

斯世民何罪諸公任代天醫能識真病生殺豈
無權如古之循吏其人即大賢高談心性者官
好自多錢

生日寄遺還十二韻

實五月二十六日也
是年甲戌余五十有

六歲在
通州

今日吾生日題詩寄兩兒別來多涕淚老去愧
鬚眉家教承書史儒修志鼎彝中年丁浩劫歧
路迫調飢言作諸侯客期訓國士知未全馴野
性大半拂時宜俗漸騰羣謗天還罰數奇請纓
無徑竇賣賦亦瑕疵誰使遊湖海而猶避魃魍
自甘爲阮籍古有幾鍾期芻豆論交易桑榆學
諂遲才名成底事汝輩莫相師

癸酉七月得慶子元訃詩以哭之

生平好酒不好錢黃金信手揮萬千生平好酒

復好色風絮因緣半傾國錢既身外物色亦身
外身惟酒不負腹一飲一石一飲一斗意車文
馬方通神當其酒酣命筆千詩百賦如夙構水
之滄海花之春所作雖不純乎純要之語語皆
天真時人不能爲乃謂非古人自君少壯世多
故食肉丈夫一再誤羅刹初揚百越波蚩尤競
起齊州霧君欲上書敢叩青雲閣君欲談兵敢
近將軍樹悲來把酒看劍長嘯元龍樓世稱怪
物相馬牛誰憐點點滴滴熱血迸作雙淚流君
之文章意氣有如此五十八年抑塞侘傺以窮

言十
死死前死後幾知已天壤一人我而已我能知
君才不能救君窮我窮實與君窮同哭君之日
我猶乞食東海東君今在天何處爲酒龍

夜坐

待月開簾坐新涼漸不同久疏燈上火最寵扇
辭風碧漢惟流水秋花又落紅遙知薄命妾無
睡盼歸鴻

寄雲如

病裏辭家慘不歡兩人清淚幾時乾書來報我
平安字爲汝今宵強一餐

隔江也有十分春，數盡花枝不當人。昨見白蓮花一朵，依稀猶似玉精神。

登木末亭懷太白

碧蘿祠宇裊茶煙，曾此行吟有謫仙。自著錦袍上天去，鳥嗁花落一千年。

向忠武

榮

張忠武

國梁

二公祠堂題壁

咸豐癸丑二月，髮賊既陷金陵，甫十餘日而大軍雲集，賊首震動，眾皆酣飽，無鬪志。其勢一鼓可下。時向爲主帥，自以老成宿望，壹意持重，頓兵長圍，冀賊他

竄張隸帳下雖屢陳方略誓掃羣醜有
戰必勝義不顧身要之左右惟命撫膺
太息而已癸丑以前賊所過郡邑無久
居意久居自金陵始由是而三吳三楚
西逮巴蜀北踰河朔南極嶺嶠糜爛幾
徧天下實癸丑之役釀成之蓋至同治
甲子事平而賊之據金陵爲老巢者已
十有二年矣丙辰營潰向以憂悸卒於
軍於是張有再造東南之功而仍無兵
柄越四年營再潰遂身殉焉二公同諡

忠武先後奉有專祠之命今吾鄉諸君子構祠合祀二公因念二公墓府余嚮者皆嘗遊之復過此祠愴然有感

盛名向寵如山重熱血張巡似海深身後史書皆赫赫眼前祠樹此陰陰十年未熄滔天禍一死難完許國心誰使英雄無用處江聲流恨到而今

十一月十五夜張海初大令招集秦淮水榭即席賦詩並呈薛慰農山長

月輪夜夜東上天珠斗迤南箕北邊有時照地

物無影乃如一鏡中天懸是誰曾見今夜月當
頭不似尋常圓廣寒佳話姑妄聽霜天坐待拌
無眠主人愛月兼愛客勝地清遊難再得清溪
西接石城潮小姑居處將軍宅招邀車馬河之
干紫裘朱履聯芝蘭賭酒十升人未醉燒燭千
條夜不寒鈿釵逐隊驚鴻墮揚州兒女新香火
眉語人前雜笑顰身裁時下矜梳裏須與歌管
動教曹對舞當筵簇錦袍一曲聲隨流水遠九
天風讓碧雲高桑根老佛閒情賦陽春到處能
調護花片都憑天女飛琴絃自顧周郎誤衆中

我獨愧平生孤負劉伶舊酒名一身湖海餘多
病中年絲竹豈忘情此時明月逐人來此時人
與月徘徊果然今夜月尤好桂花不落梅花開
板橋風景惜非舊何當還我吹簫臺亂後余買
遺址實影孃故居
也至今未能修葺白頭綺障無他願再看月圓

五百回

讀胡文忠公遺集題後十韻

第一中興佐千秋定屬公至誠支浩劫再造矢
孤忠狂寇滔天甚時流束手同十年聽鼙鼓萬
里化沙蟲漢水來開府軍書始發蒙楚吳匯全

局智勇奮羣雄但著先鞭去如操左券中星真
高北斗律總競南風太歲夢當酉斯人瘁鞠躬
後來守成算儀弼乃元功

題河東君小像

生不許爲奇男子得天者雌已羞死況復逐隊
凡裙釵不如早向青山埋妾家寒門大非偶色
身事人妾不醜相天下士通以神眼前都是尋
常人纏萬貫錢窮措大食萬戶侯賊無賴但願
嫁一古丈夫千秋同礪千金軀錢公才望厭當
世妾每見之輒心醉半野堂上初來時貌男衣

冠意可知今日爲公奉箕帚他日附公倘不朽
傭花媵月年復年神州一旦塵與煙公走告妾
妾私慶妾請卜公公致命公東海蹈妾問津公
盡室焚妾爇薪公雉經耶妾裂帛公鳩飲耶妾
浮白公雖無妾死有光妾從公死名尤香豈知
公念不到此如妾所言寔入耳公從此後鬱鬱
居謂妾鬱鬱當何如無何公死家禍作豚犬猥
瑣鳩鵲惡公已失勢誰相憐得妾一死家瓦全
公負君恩計良左妾受公知殺身可此死毋乃
鴻毛同女兒心肝國士風

丁烈女詩

丁女名沁雲爲揚州丁楚玉翰
甫名某之女太守燮甫名某茂甫容
家皆宦於鄂未婚而夫死女死烈時寓

居南

通州

同治癸酉六月初五日未昏阿兄驅車歸在門
阿妹驚立起阿母大歡喜兒自楚來幾日矣楚
中幾月斷音書吾壻之病今何如對曰壻健固
無恙語不成句顏不舒阿妹然疑無問處逡巡
却入房中去入房豈向房中行竊聞兄語漸有
聲似言壻病本不起歸葬何所尤分明阿母搖
手呵曰止老淚點滴腮閒盈女行仍至中堂來

一紙擲向兄之懷去年微聞壻有疾妹卜如神
言不吉暗置襟帶閒跬步不敢失請兄試讀紙
上字人生修短由天意妹命不諧奚怨尤此何
等事兄猶秘兄言妹性如男兒凶耗誰敢使妹
知妹既已知之幸勿多傷悲母前欲勸勉口鈍
難爲詞女色揚揚如平常晚飯才罷歸蘭房母
微窺之息在牀銀釭閃閃窗周防三更小婢母
前過道女嚴妝起更卧母來喚女女不應藥甌
殘汁如膠凝啟幃視女女何有當日聘釵握在
手花貌亭亭玉體溫烈魄貞魂行已久此之謂

慷慨此之謂從容此之爲正氣此之爲女宗女
何人姓丁氏婿何人宋公子壻生蘇州女揚州
兩家宦鄂約婚嫁婿未及婚一病休女今覓壻
從黃泉相逢倘比雙玉肩鞭龍鞚鶴上九天阿
母阿兄呼天痛哭夜不眠

鄭千總死事詩

鄭君鴻謨金陵人官千夫長勇冠倫老父都護
鬚如銀時清無事家陽春一朝楚澤紛煙塵督
師奉命誅黃巾吳中十郡調發頻父名在調君
則顰衰年何以勝戈種兒壯能舉鼎百鈞督師

曰善汝代親壬子冬仲旗鼓新丈夫許國盜

酸辛明年遇賊西江濱地名草鞋夾賊騎壓地魚貫

鱗我軍欲戰萬手皴南風無氣白日湮惟君虎
視雙目瞋有刀不鈍馬不馴殺賊無算如刈薪
犬狼四面環而狺自辰陷陣今且申君裹創起
方逡巡賊已交刃君之身咸豐癸丑月在寅初
九日晡君成仁丹心感愧邀恩綸魂歸猶戀
蘭陔循是眞孝子眞忠臣

斷指生歌

生何來斷其指指則斷氣如矢老拳貫竹臂能

使一日猶書一千紙生滁州人獨行儒聖草善
作黃門書當世貴重等萍綠換羊求判何時無
十年鼙鼓江上頭都督者誰踞此州諸將豈但
絳灌恥出身大抵巢芝流生於爾日困鄉井如
抱荆棘爲牢囚一騎飛來花底宅非分誅求到
煙墨倪迂之畫戴逵琴誓不媚人請謝客彼哉
聞之勃然怒大索捉生官裏去門外駟駟牛馬
走堂上吽吽虎狼吼金在前刀在後書者得吾
金不書戳女手生上堂叱叱且詈盜泉之酒我
寧醉女今殺我意中事語未及罷指墮地左右

百輩戰色酖生出門笑笑且呵筆鋒不畏刀鋒
多刀乎刀乎奈筆何乃知世有鐵男子一字從
來泰山比古今惡札常紛紛痛惜生平指頭耳
死灰既死不復吹生雖斷指書益奇墨花帶血
光陸離從生乞取半丈幅張之草堂白日驚夔
臄

題甕芳錄爲高君渭川死事作

高君渭川
邑人癸丑

二月金陵城陷君奉家屬投甕中
死之其季子子安輯甕芳錄徵詩

賊何能能殺人世人畏死乃惜身賊所至處驅
縛如雞豚鬚眉男子數十億萬輩搶地不起甘

作搖尾鱗朝運百甌粟暮伐十束薪東眠西食
逐隊牛馬走千金之軀誰敢陳苦辛咄嗟小有
不如意輕者鞭箠重斧斤種種楚毒之肉化皮
毛皴道殣相望橫荆棘烏鳶刷翅狐膏脣或更
搜括入軍帖白面教執戈與種赤脚疾走燕吳
秦長日一飯饑腸輪夜半露宿轟雄蟲一朝狹
路猝遇官兵屯馬頭風起烈火焚心落膽裂縮
蝟蹲頭焦額爛寒蟬呻一網打盡無逃奔紅旗
飛馳露布文臣某某日某地戰勝兵如神陣前
斬馘無算級髮尺有咫纏黃巾安知蠶蠶者前

日皆良民今日爲賊死泉下聲猶吞湖海一萬
里無地容冤燐然則畏死得死等死耳泰山鴻
毛榮辱分何不殺賊江之濱一身慷慨酬至尊
成則銘吾勳不成成吾仁此義難與凡夫論惟
豪傑士勇邁倫命不足貸志必伸當賊未至時
散錢千萬緡一家不惜從今貧所願號召白甲
淨掃機槍氛當賊方至時仗刀立斜曛城頭打
鼓雷殷殷恨不從天飛下立掩魑魅羣及賊陷
城時黑霧塞四垠守陴早星散將士徒紛紛匹
夫雖攘臂不能成一軍詛天天無語切齒血滿

齟羣兒竄伏爭閉門此獨開戶如延賓香花百
拜稱罪別家廟呼兒冠帶婦帔裙弱息襁褓一
一顏色新彬然怡然羅跪在堂下與汝輩約無
逡巡僅此片時活且醺酒一尊賊面不可見賊
語不忍聞勿謂草莽非縉紳無名之死不得干
青雲勿謂老耄諸童昏矛炊劍浙尙可延甕殮
人生一死無二死時事至此痛哭胡云云庭前
有甕甕有水水尤清白絕點塵可以滌妖穢可
以藏英魂甕中自有一天地從吾遊者嬉陽春
衆口一諾正氣直上通九閻餘語嘖喑聞諸鄰

鄰父走勸逢怒瞋有僕有僕竈下來欣欣我能
收君三世併命同一墳此時目中並無賊但覺
賊中只有幸死無苟存他日 日下頒溫綸千
秋祠祀光榆粉季子嶽嶽天家珍自是 盛朝
揚清激濁之 殊恩死者初意寧知孰者爲義
士孰者爲忠臣噫吁嘻此何人君不見癸丑二
月吾鄉高君渭川及其二子一婦三女孫

丹陽魏冠山州倅

占鰲

暨其仲子樸甫明

經純 死事詩

是真男兒不虛生七尺之軀千秋名是真男兒

不虛死臣爲忠臣子孝子常人生死權在天非
常人則人有權可生之生無苟延可死之死無
苟全不見曲阿大小魏世難同歸風凜然方賊
陷城時賊騎城中馳惡聲與惡色何可聞見之
殺賊固無計罵賊猶有詞殉城父無憾從親兒
敢遲只今血碧處來往雙靈旗帝聞賚良厚祠
祀官其後取義成仁此不朽草茅名姓燭山斗
當時不乏貴官走束縛妻兒逐牛狗偷生能多
幾日生聞斯人風噤無聲偷生不得更得死地
下相逢鬼顏泚

題湯貞愍公畫幅爲薛慰農山長作

忠孝家風仙佛心文章有傳在儒林豈知餘事
丹青引一例千秋重碎金

詩中有畫畫中詩也要名山興到時能事從無

章急就十年償諾未爲遲

卷中自跋有久未奉報云云

東風此夜硯開冰寶墨花融筆露凝想見香温

茶熟後兩邊紅袖翦春燈

貞愍有詩畫女弟子數人其翹楚日玉月

蹇驢何處逐吟鞭翁醉童嬉滿目前自是江東

全盛日梅花香裏過新年

錦繡江天劫火餘再來門巷半生疏畫圖茅屋

無尋處。況問將軍水石居。

貞愍於金陵之冶城山雞籠山各構別墅

並饒佳勝
今俱蕪沒

薛公此寶勝。琳琅老屋藤花爲護藏。

山長所居
曰古藤香

館休信他年神物化。風流癡到顧長康。

泊江上

黃葦一江花。停舟片月斜。艣聲驚蒼犬。燈影誤
林鴉。身老難爲客。天寒更念家。不如隄上柳。長
繫釣人槎。

感事

不堪唾罵處。流涕一悲歌。海客交情重。儒家鬼

物多文章成罪案黨禍此風波吾事毫芒甚將
如世運何

月當頭詩八首

霜釀風銛夜氣孤天心冷抱此冰壺年年照徹
人心事抵得西來棒喝無

頂上圓光一鏡磨脫巾幾客醉婆娑老奴恐被
寒簧笑底更年來白髮多

絕頂樓臺倒影難小庭梅樹獨高寒開花有意
橫斜去要等姮娥側面看

廣寒宮殿四時春終古扶疏桂一輪倘有風吹

言十
金粟落天花壓帽是何人

乘風更欲訪吳剛直到瓊樓玉宇旁踏穩一微塵世界萬人頭上奏霓裳

風鬟霧鬢掠銀雲碧海青天近十分今夜夜深泥首拜下方人語倘知聞

壯士天山尚枕戈月皚如雪湧金河不知鐵葉兜鍪底燕頤封侯得幾多

舉頭凝盼低頭認此夕清光徧九州星斗四邊無一顧誰從天外更昂頭

送宗山嘯梧奉檄金州公事

人生一鷗鳥海上幾神州行脚不到海其人非
壯游我歸日南外君去天東頭差快平生志身
經萬里流

寒雨甬江東菰蔞客味同論交牛樞下話別雁
聲中八月方秋水長天況大風放君架吟筆萬
樹海珊紅

海國平安久還防事未來君護戰船木料至瀋陽蓬瀛競
花鳥鮫蜃富樓臺危是何時漏瀾從幾處回此
行憑巨眼君本出羣才

和會稽陶心耘濟宣孝廉見贈原韻

五柳家風氣，轆塵結綺亭。畔締交新姓名，天上

金為字，湖海年時玉當薪。夜盡有書君下酒，試在

院中君嘗誦漢書竟夕眾中如葉自憐身，不成一事狂奴

老青眼，王郎更幾人。

和鄞縣郭晚香傳孝廉見贈元韻

曲江潮氣白如銀，湧起枚乘綵筆新。一代龍門

推國士，九天鴻羽作秋賓。余於丁卯八月既望始交君於吳和甫師

杭州學院師稱為當時第一作者是年君領鄉薦，春風去後稀梅使朔

雪逢君，賸葛巾。湖海鬚眉今老甚，生平孤負種

榴人。榴石山房和甫師藏書處也

再贈晚香仍用前韻二首

米作丹砂雪作銀一回世事一回新
餘年病起仍湖海幾處嗟來當主賓
孺子自修橋下履先生誰折雨中巾
此鄉問徧春消息除卻梅花即故人

東風吹起鬢如銀眼界還從歲琯新
花市春燈方買夜草堂人日況留賓
勞薪又逐如飛舸熱酒難澆有淚巾
一語要君三太息最繁華地最寒人

題李小池環游地球圖

地圓九萬里聞者疑其誣病在見太淺匪但布
指疏試問地不圓邊際安在乎自從國初來
西法斯權輿近今百餘年乃見全地圖海居地
大半平土海之餘可名者萬國一一疆域臚風
教有後先生殖固不殊所惜華之人視海爲畏
途安得真勇士環海窮步趨李子抱奇氣自奮
七尺軀願爲地中鵬勿作轅下駒丙子美大會
請觀國所無百蠻懷其寶來者繁有徒吾華稱
中朝詎可牛耳虛李子實承乏及時效馳驅言
自春申江東行乘其桴波瀾極遠空天風吹衣

裾醉酒一長嘯蛟龍遙相呼舟所不通處連山
排以車麟麟欲上騰捷與羲輪俱但覺煙霧橫
甯受塵土污計四萬餘里始至美國都其地與
吾華顛倒足合跣我方望扶桑彼已日下晡當
彼方午炊則我雞鳴初推遷凡六時對待如一
隅勝會既已輟束裝賦歸與若循來時蹤應是
西征徂李子惟東行奚慮長途紆朝朝太陽出
步步春風蘇東而又東之由粵漸入吳再四萬
餘里仍返申江居是知地體圓環轉只一樞視
人所向背東西無定區昔往夏之首今歸月在

辜二百六十日如命飛仙鳧想當壯遊時萬國
親見諸洲島而城郭孰者瘠與腴嗜好而風俗
孰者智與愚蟲魚而草木孰者苑與枯佛何必
天竺仙何必方壺槎何必星漢夢何必華胥蜃
何必有樓鮫何必無珠王何必毘騫民何必侏
儒釣何必一鼈樹何必一瑚冰何必非火山何
必不魚古人所可信其語若合符古人所傳疑
其語皆胡盧李子就所見勒之爲成書傳示後
之人庶幾楷與模餘事付圖繪卧遊還起予蒙
於地圓理差能悟其麤是役惜未從執鞭備僕

夫題詩姑妄言李子謂何如

號寒曲

號寒勿號寒號寒向青天司命無大裘太息難
爲憐號寒勿號寒號寒驚其羣山雞多修翎從
來不相聞號寒勿號寒號寒更苦饑雪田有稻
孫欲飽甯不飛號寒勿號寒號寒已無家朔風
撼空林破巢時欹斜號寒勿號寒號寒又何心
汝猶語成聲不見蟬屢瘖號寒勿號寒號寒無
處無汝猶尾脩脩不見烏畢逋號寒勿號寒號
寒寒未央十日九不晴今冬無太陽號寒勿號

寒號寒寒不知但使凍未死陽春有來時

郭晚香招飲即席口占

乍炎天氣可憐宵月殿高寒碧漢遙聽過十洲
春雨處綠陰門巷總魂消

清淺雙湖水一涯錦帆簫鼓夕陽遲回頭絕憶
青溪曲百隊燈船正此時

鶯鶯燕燕各知名紅燭光中客感生一種歌聲
醉心骨白頭人聽不分明

吳孃清瘦勝梅花難得鄉親住若耶我亦江湖
飄泊慣魚羹菰飯便爲家

三蕉葉酒不勝嘗誰信生平有醉鄉一斗不能
能一石臣髡當日更清狂

雪袂風裙幾主賓閒情如水氣如春衆中我最
疏慵甚未必花枝不笑人

送陳芟南方伯之米利堅

地豈分中外由來海限之即今王會遠幾處使
星馳此去憑旌節流人與護持歡聲若雷動遙
想迓君時

一片槎如駛天寬水更寬斯人即舟楫大海不
波瀾陸賈南橫劍班超老據鞍勳名從古重莫

作壯遊看

六十自述用五十自述元韻

誰聞日落尙麾戈去過韶華且任佗用借劫火餘
生身是燼迷津慣哭眼無波自臣之壯鳩營拙
與世何仇蜮射多我更不如枯樹甚頻年長此
命宮磨

側身南望海如杯萬里何堪首重回有約桃花
留客住無端萼菜帶秋來丁卯在粵辭聘而歸五侯樓護

原非偶七子嵇康最不才鶴背尙餘錢幾許一
池荷葉半岑苔

江南從此客恒饑幾日辭家幾日歸鸚鵡能言
眞可殺橐駝無翼不知飛石依佛座同香火樹
近王門盡錦衣獨我登龍舊聲價如今萍綠竟
全非

天風吹我甬東行贏得江湖落魄名白髮賣文
尤齒冷朱門乞食要心平雞鳴豈不憂當世鶴
性終能累此生身後未應常寂寂摩挲詩卷若
爲情

山西婦

山西有一婦出身自清門結縭舊家子兩小早

畢婚時世方清泰鄉里古處敦家教重詩禮伉
儷猶友昆皇天胡不惠甘雨膏久屯六載地不
毛穀貴如瑤琨非時或一食遑計饗與飡家人
半死亡夫婦尙僅存夫行不成步僵卧腹屢捫
婦謀飯其夫誰能憐王孫長物賣略盡截髮甘
自髡買髮未逢人夫體已不溫婦乃投古井願
葬斗水渾旁人拯之起或進粥一盆婦心更慘
惻瘧哭無淚痕嚮冀夫命延妾當伴朝昏夫今
既餓死有食寧能吞縱得日日飽妾命常有根
牀頭逝者誰何以訓舊恩三日絕水漿去去隨

夫魂作鳥作比翼爲花爲合婚豈無重命者乞
食隨人奔昨夕夫君前明旦何鄉村紅顏易爲
活悠悠難與論

送曾襲侯出洋

江上逢旌節中朝第一流時名謝安石先德武
鄉侯許國無回顧彌天此壯遊長風九萬里
何止到瀛洲

海外有天地華人紛慕羶花貪佛界土金趁瘴
鄉錢求富幾如願寄生嘗可憐遙知望塵者羅
拜使車邊

代天宣撫事韓范自權宜成算況親授豎儒
盜敢知仄聞西學士豔說古經師羶酪窺文教
將無在此時

欲賦從征曲生平壯志灰執鞭誠所願磨盾已
無才白髮餘年淚黃金何處臺舊時門下士如
我至衰頽

日本女

九萬里地飛紅埃何人不趁申江來申江聲價
數誰貴名優名妓喧如雷當其廣場露身手贊
者紛紛不容口偶然熱市一經過多少癡兒車

後走散地金丸颯颯同圍天錦障家家有有客
城東遊笑語歸未休爲言嬉春百尺之高樓東
海女兒十五六衆裏亭亭奪人目雖古施嬾窳
過之雪膚花貌玲瓏骨欲笑不笑尤嫣然柔歌
豈借管與弦手中鈿榼未盈尺四時花木開萬
千忽提長刀白於練飛騰直上屏風顛曼聲一
閃破空走虹垂電掣落九天君等凡塵少所見
眼前失此神仙眷我聞不免心然疑月夜親窺
玉山面果然入畫是真真排當百戲能通神今
之優妓非其倫胡爲飾髮無寶珍氍毹作衣僅

稱身門前雙屐自來去目成心賞殊無人四旁
坐客落落星之晨海東去此幾何里而來寂寞
申江濱吁嗟乎金一斗珠一斛更有蛾眉稱寶
玉一斗金一斛珠寶玉皆當時優妓之有名者如卿只買百銅錢怪
我頻年同碌碌

蘭陵女兒行

將軍既解宣州圍饒歌一路行如飛行行東至
瀨水上乃營金屋安玉扉步障十重列紈綺流
蘇百結垂珠璣天吳紫鳳貼地滿珊瑚玉樹燈
相輝靈燭之柈大蠡瓊椒花釀熟羊羔肥坐中

貂錦半時貴，眼下繁華當世稀。道是將軍畢婚
禮，姬姜舊聘今于歸。蘭陵道遠，蹇修往春水，吳
船憑指揮。良辰風日最明媚，雪消沙暖，晴波翠
雙橋兒女競歡聲。新年梅柳，酣春意，卓午遙聞
鼓吹喧前津。已報夫人至，將軍含笑下階行。眾
客無聲環堵侍，綵船剛艤將軍門。船中之女隼
入而猱奔，結束雅素，謝雕飾，神光綽約，天人尊。
若非瑤池陪輦之貴主，定是璇宮宵織之帝孫。
願身屹以立，玉貌慘不溫。斂袖向眾客，來此堂
者皆高軒。我亦非化外，從頭聽我分明言。我是

蘭陵宦家女世亂人情多險阻一母而兩兄村
舍聊僻處前者冰畦自灌蔬將軍過之屢延佇
提甕還家急閉門曾無一字相爾汝昨來兩材
官金幣溢筐筥謂有赤繩繫我母昔口許茲用
打槳迎期近慎勿拒我兄稍誰何大聲震柱礎
露刃數十輩狼虎紛伴侶一呼遽空集戶外駭
行旅其勢殊訶訶奮飛難遠舉我如不偕來盡
室驚魂無死所我今已偕來要問將軍此何語
女言縷縷中腸焚突前一手搃將軍一手有劍
欲出且未出我言是真是假汝耳聞不聞我惟

捉汝姑蘇去中丞臺下陳訴所云云請爲庶人
上達堯舜君古來多少名將鐘鼎留奇芬一切
封侯食邑賜錢賜絹種種國恩外是否聽其劫
掠良閨弱息爲策勳詔書咫尺下五雲萬一我
嫁汝汝意豈不欣不有天子命斷斷不能解此
紛汝如怒我則殺我譬諸么麼細瑣撲落糞土
一蚤蟲不則我以我劍奪汝命五步之內頸血
立濺青絕裙門外長隄無數野棠樹樹下餘地
明日與築好色將軍墳一生一死速作計奚用
俯首不語局促同斯文將軍平日叱咤雷車殷

兩臂發石無慮千百斤此時面目灰死紋頰如
中酒顏熏熏帳下健兒騰惡氛握拳透爪齒齧
齧將軍在人手倉猝不得分投鼠斯忌器無計
施戈矜將軍左右搖手揮其羣目視眾客似乞
片語通殷勤眾客驚甫定前揖女公子聆女公
子言怒髮各上指要之將軍心始願不到此求
婚固有之篡取敢非理鹵莽不解事罪在使人
耳若兩材官者矯命必重箠如今無他言仍送
還鄉里將軍親造門肉袒謝萬死敬奉不腆儀
堂上佐甘旨事過如煙雲太空本無滓請即回

舟行食言如白水女視衆客笑且顰諸君視我
黃口俛彼今大失望野性詎肯馴山魃尋仇讐
蓄念愈不仁慨從軍興來處處兵殺民殺民當
殺賊流毒滋垓垠蘭陵官道上若輩來往頻不
在霜之夕則在雨之晨我家數間屋獵獵原上
薪我家數口命慘慘釜內鱗彈指起風波轉眼
成灰塵與其種後禍終作銜哀憐閻羅知有無
夜臺寃誰伸何如踞九重天必無私綸或竟辣
手作公論自有真明知我此來螳斧當巨輪甯
猶計瓦全惜此區區身諸君調停詞蔓甚我弗

遵衆客更前揖請勿變色瞋將軍負賢名毛羽
夙所珍壹意希儒風裘帶殊恂恂此舉大不韙
一旦傳聞新萬口鳴不平可知詈申申惡聲來
有由欲辨難鼓脣白璧自污之罔值錢一緡悔
過方不遑恨無障面巾江東諸父老相見慙相
親況敢犯衆怒興戎自婚姻得罪名教盡不復
能爲人斯人非尋常四方戰賊多苦辛大才雖
非管樂匹英風猶是奢頗倫女公子既世家齋
幸爲朝廷寬假能罷臣他日之事願以百口保
某也官府某也鄉縉紳翕然長跪代請命惟女

公子爲仙爲佛爲天神女知衆客意難拂乃曰
我爲諸君屈諸君前說姑置之我與諸君借一
物我聞彼有善馬名白魚日行千里猶徐徐我
之發蘭陵辭家計已四日餘老母痛哭常倚閭
兩兄中庭握手空唏噓若乘此馬歸到家可及
今日日落初自今我亦棄敝廬卜鄰別有秦人
墟桃花林中奉板輿從兄去讀黃石書武陵隔
絕癡兒漁三日五日間我既遷所居秣陵蔣尉
祠歸馬其何如將軍此馬不數馭至此惟恐女
不去急呼從者牽馬前四足霏霜耳披絮女一

顧此馬眉宇色差豫撒手始釋將軍衣身未及騰鞍已據一聲長謝破空行電掣星流不知處女行數日軍無騷將軍振旅膽氣豪鍾山之旁營周遭賓僚迎拜將軍勞斗酒勸醕新蒲萄鉦笳雜奏聲謹叟雲中匹馬塵甚囂清光無恙來滔滔千金一諾券果操將軍迎執歸其曹馬汗如血長嘶號背上有物臃腫拳曲縱橫束縛三尺高乃是材官當日將去之聘禮封還不失分釐毫聘禮脫盡處薤葉多一刀刀光搖搖其鋒能吹毛將軍坐此幾日夜睡睡不牢

會稽王孝子詩

孝子名繼毅會稽諸生侍父任在鄞學先是父病焚

疏請代未遂既而母病復疏於神先自投鄞之月湖死而母病果愈不得謂非純孝之所格也事在光緒六年四月

男兒七尺貴有用致身只在君父間青雲果已位通顯譬如良驥登天閑國士遇以國士報生平自命管樂班方其許國馳驅日感慨不畏時局艱中原鼙鼓絕域節臣有誓死無生還臣家之事置度外生男嫁女皆等閒雖如太真絕裾去辭親不復歌刀鐙勳名蓋世自有在再造王室摧諸姦以親較君君爲重青史未用多譔訕

若猶伏處在鄉里晨夕救水歡親顏兒家雖貧
兒志潔白華竊比茅與菅二人以外復何慕方
寸蚤已蕪穢刪親其康彊即兒福親病奚翅兒
恫瘼先是父病困牀蓐桑榆日色黯甚殷兒請
代父神弗許一朝熱淚空雨潛父骨未寒母又
病二豎對峙云亭山泥牛入海百藥盡良醫不
補真宰患天之定數誠鐵案儻竟坐視無轉圜
讀書識字乃如此文采麟鳳心豺豕兒於爾日
少人色食仄衣道黑髮頰中庭露禱向神語兒
母若死兒罪輟神能聽兒活兒母願以兒命爲

贖醵兒母所生代母死一息豈敢貪塵寰兒之
此行況甚樂含笑往侍地下鰥阿兄阿弟善事
母但祝至老萊衣斑伏地喑咽焚一紙鏤肝鉢
賢詞迴環夜半既禱亟走出楊柳之渡芙蓉灣
平步有水水有路重泉城府如夙媚明旦居人
大謹譟屹立水面挺不彎士民萬輩來酌酒洒
作湖水增清潺想見汨羅弔屈子年年笳鼓喧
南蠻兒心既遂豈徒死兒算遺母神甯慳是日
母病即少差慈容漸起從前孱固知至誠神所
佑蒼蒼誰謂隔九關君不見會稽王孝子此風

可以勵慳頑血性勿疑賢者過高山可仰不可攀報親何必非報國由來聖化始闡闡忠臣孝子同不朽 恩綸咫尺光煇爛

謝貞烈女詩

以人問天天不語人欲作鬼鬼不許斯人何人君子女女姓謝氏曰某姑明詩習禮美且都許字某郎妾有夫夫早歲死妾尤少夫生未婚死可弔夫行勿前妾且到願爲雙死同一棺不願獨活摧心肝妾有一尺刀光寒妾手如絲刀則重妾血如泉刀不痛妾骨如鐵刀無用人來奪

刀刀去喉刀入人手妾有頭頭縱可留心不留
妾心不留妾必死及妾未死夫有子不了之事
乃如此子漸長成妾病危是妾地下從夫時天
乎鬼乎今鑒之

題王子獻

繼香

孝廉天童紀游圖卷

十萬株松樹天童青若何三年甬東住恨未一
經過冷局無游興衰容況病魔山靈應見拒此
老俗塵多

今宵欣讀書更讀書中詩一一好林壑斯圖乃
盡之凡君行脚處皆我會心時儻有後游日還

當蠟屐隨

題宗湘文太守愛山臺圖四首

古之名勝地極目半寒煙金谷蘭亭外斯臺今
歸然青雲三百尺黃鶴一千年湖海添佳話由

來仗後賢

臺在湖州郡治內爲南宋汪
亟所建久圯太守始新之

君家卧游者畫外一山無何似登臺望衆山爲
畫圖閒時來拄笏勝客與提壺萬里長風想高
空倘一呼

既叱嚴州馭明州節又移馳驅徧吳會治行

九重知石是三生契山還一簣爲今看叢菊滿

香到晚秋時

太守自嚴州移守甯波郡治西偏舊有假山地廣數畝久廢不治大

守誅茅覓徑雜植花木而築草堂其上云

餘事愛山耳仁人自愛民愛民造民福民亦愛
仁人竹馬歡迎處再來情更親

太守兩守湖郡

只今臺

下路棠蔭有餘春

烈女行紀黃婉梨事

君不見黃婉梨生不甘爲讐人妻虎狼累月相
提攜一夕殺之如殺犬與雞貞魂烈魄雖下地
浩氣上與青天齊

一解

婉梨金陵人儒風舊家

是癸丑陷賊中女生五齡耳有母有弟有兄嫂

全家種菜隱鄉里阿母教鍼綫阿兄授書史門

外汚者塵門內清如水

二解

朝朝盼官兵十有

二年久官兵既收城全家開笑口叩門來一兵

狀貌比賊醜搜屋無一錢怒掣刀在手女前跪

致詞請以身代母兵曰不殺汝殺汝全家人汝

能飛去否

三解

全家被殺時女木立若癡兵徐

縛女出鞭馬還怒馳江干棧有船驅女使上之

告以歸湘南妻汝汝勿疑

四解

女心默自計我

死寧有他我固不惜死全家讐則那忍淚向讐

語我方身有疴隨汝到汝家嫁汝締葦蘿今有

同船人男婦數十多汝若苦逼我我惟沈江波

不見金家婦汝奈江波何

時有金眉姑亦金陵人上船時投江死

讐竟帖耳聽不敢相詆訶朝夕敬事女水程累

月過

五解

水程累月盡舍舟當就陸同舟人各

行同行一讐獨女心搖搖撞小鹿此去不知何

處宿何日誅讐死瞑目

六解

行未數里橫來一

人伴讐而走甚狎且親數數目女道女美彼此

虐謔紛笑瞋女聞無言眉暗顰兩惡男子意不

馴我一弱女寧其倫事急惟有死保我金玉身

報讐在今夕萬一沈冤伸不報亦今夕銜悲極

千春逆旅急偷閒留詩壁間塵後有讀之者爲

我聊酸辛

七解

倚裝幾何時白日暗平楚兩愴

羅酒肴燒燭照窗戶呼女陪壺觴教女伴歌舞

缺音恣號呶時雜鶯燕語逆旅夫何知夜寐各

賓主

八解

明日之日日正中房門不啓人無蹤

破局睨視生悲風一男中鳩死口鼻皆青紅一

男毒較輕白刃洞在胸一女挂羅巾徧身窮縋

窮細讀壁間詩了了陳始終乃知女所爲辣手

眞從容萬口嘖嘖稱女雄此女母乃人中龍

九解

噫吁嘻女事雖幸成女心尤慘悽色身餌人

餓虎蹊一日未死憂噬臍欲死不死呼天號至
誠所動天聽低乃以杯酒爲媒梯仇讐刃畢月
未西青溪之水魂歸兮世無血性諸紅閨綺羅
金翠眞土泥君不見黃婉梨

十解

駱烈女詩

金陵張氏女母遣嫁駱家將女來作婦女較郎
年差將婦來作女郎待女及瓜雖非共命鳥已
是同根花

一解

丁丑秋仲月郎病忽大作女年

十五餘頗解奉湯藥郎雖不言死女知郎夢惡

女雖不言死郎知女心諾

二解

一朝郎竟死妾

死何旁皇堂前尙有姑妾死還商量姑以郎爲

命郎死妾未亡郎心不忘姑妾身宜代郎

三解

姑乃前致詞非婦汝勿守女曰女甘之姑喜不

容口母亦前致詞再嫁女弗醜女曰女胡然母

怒掩耳走

四解

他日母病聞聞病女乃行行行

至母門母則當門迎連牀疊錦綺大衆歡有聲

女知入羅網霽色了不驚

五解

含笑語衆人女

事母爲政母寧不愛女擇壻想已定召女庸何

傷不祥乃稱病請歸一辭姑明日惟母命

六解

脫身歸至家姑前陽陽然夜半結縞帶搶地呼

青天無郎妾何戀無妾姑可憐兩全今未能妾

從郎九泉

七解

孟冬旬二日女化若仙舉母方

哭女來女魂慘欲語強嫁恩已斷茲來哭何許

作詩竊史權書之駱烈女

八解

題王子獻孝廉硯銘

相石如相士無言通以神平生青眼裏希世幾
殊珍但願壽千古休論價萬緡多金買田者不
是草立人

各有三生福全收鐵網珊物常歸所好人不厭
相看昔我端州住其年秋水寒空山誰對語一

片石都難

壬戌之秋余客肇慶值水患不能采石歸時僅載一硯猶中材云

為人題羅浮香夢圖有調

花滿空山露滿衣天風環珮是邪非若無青鳥

殷勤喚如此銷魂定不歸

自是無郎獨處時早春風月惹相思一從嫁與

孤山後倚樹酣眠更有誰

我傍羅浮幾泛槎塵容無分伴煙霞休論枕上

春婆夢醒眼何曾見一花

有客南枝感夙因莊周胡蝶比前身今生化作

梅花去料理他生化美人

秦淮雜詩十首

燈火秦淮舊有涯而今畫舫盡東移
荒城野水

仇家渡也似人生得意時

前明燈舫以東西水關爲十里秦淮載諸

板橋雜記甚明及余少時所見西關不能如明時之盛惟自東水關至文德橋而止數十年無少異今則東關迤西漸無人迹而船市東聚於仇家渡且駸駸乎入大中橋矣

煙月城南路幾條更無人問往來潮
釣魚巷裏

春如海便抵當年長板橋

板橋雜記謂明季歌姬舊院爲最次則舊

丙次則珠市其後舊院少衰與貢院前牛市鼎峙而三無所軒輊而東西釣魚巷次之賊亂以前大致如此今則冶遊所趨惟釣魚巷爲煙花淵藪他無聞焉

南朝閒煞好樓臺盡買揚州芍藥栽
料得二分

明月色一齊收拾過江來

髮賊之亂金陵歌姬雲散冀羣一空今之

粉白黛綠望衡對宇者大抵自揚州而來前後凡數十百輩竹西歌吹其盡於此乎否乎

桃葉渡頭春不歸重來風景更全非琵琶商婦

皆黃土賸有年年燕子飛

壬申癸酉之間有振白門新柳記者尙附

載金陵舊姬數人列之衰柳以志餘慕十年以來之數人者又俱老死而北里名姝今遂無一土著輕煙淡粉之風流於是掃地盡矣

東舫西船面面鄰煙花原是一家春近來都愛

樓居好落得藏嬌各避人

舊時燈舫不施屏障而客與諸姬從無不同

舟者風露涼宵萬花齊放煙水離合相望而不可相從所以稱雅遊也今則船上皆安高樓大可容十數人騁聚而嬉招搖過市不足爲外人道矣

玉笛聲中寫豔情幾人心醉不分明白頭爲是

開元曲也向樽前百感生

金陵諸姬小調尤勝雖靡靡鄭衛而柔絃

脆管儘得樂府之遺今則盛稱裏下河調間有一二能歌舊曲者聞之黯然

美人頭上幾花枝羞縮黃金縷縷絲數一枝花

一杯酒昔年臣醉欲狂時

舊時諸姬夏日晚妝後皆結抹麗爲流蘇

簪之可數百朶香風四流不御釧羽今則無此妝飾金斜玉橫至不見髮鬪靡而已

泠泠風月夜濃時少卻青天筆一枝絕憶繁星

千萬點塔燈光滿月牙池

縣學面秦淮爲泮池故有月牙池之名報

恩寺塔雄峙池右高數十丈時人謂之文筆環塔有燈不數數點點時則斯池獨有倒影泛舟

者必聚觀之今塔燬於賊

幾多金粉水雲鄉
蔣妹祠前碧草荒
寄語曇雲

諸弟子青溪居處更無郎
賊平之後金陵女尼最夥故三山二水之間

新築尼庵相望於道而小姑祠之在淮青橋畔小菴者蕪蔓已久若輩蓋葺而居之其名甚

正青溪香火未必不勝於南海經魚也

舊京喬木久傷心
丞相空拌種樹金
滿地夕陽

無障處至今一柳不成陰
舊時秦淮兩岸百步數十步之間必有大

樹一二株泛舟者隨意繫繩流連嘉蔭往往終日自賊來全燬之曾文正公前後三督兩江凡

命補種柳樹者數矣所費不貲而奉行不善朽株淺蒔不遂生意至今無一柳焉

失題

護是宜男草兒爲證
果人何知兒墮地翻累草

長春渺渺重泉夜依依孤露身可憐頭已白從
不識慈親

滄海風吹水平生夢幾回神山尋路到仙姥自
天來空有霞爲帔還傾露滿杯始知謾未隕佛
地正花開

丹徒包明經室嚴孺人割臂圖

鳥曷貴有鷓魚曷貴有鰈郎身重千金妾命薄
一葉郎今病何憂何不移病妾切切呼問天高
高天不答一解郎病郎且死妾豈有力能回天
郎死妾俱死此事在妾天無權郎或不死未可

知妾雖百死夫何辭妾臂上有肉妾爲郎醫之

二解

夜深無人獨拜當戶鑪香上雲樽酒澆土

紅燭雙行白鐵尺許郎生郎死在此一舉索噓

欲絕暗泣零雨

三解

袒臂直前奏刀毅然血漉

漉湧泉肉團團割絲連肩帶肘妾不知但覺雪

肌冰理刃過無留遲

四解

急將一瓣肉投之百

沸湯傾之碧玉甕兩手戰戰持向郎

五解

郎僵

卧若蠶惟鬼語誦誦方半醒半酣扶郎就郎口

郎飲之而甘

六解

郎腹隆隆鳴郎汗濺濺出遲

明與郎語清響勝昨日三日餐有加五日杖繞

室七日召賓朋十日病若失

七解

可知從前疏

郎非必死病昌陽與豨苓醫者違其性豈眞肉

有神妾乃奪郎命郎命不當絕妾乃得天幸

八解郎體日以安妾傷日以重當時未爲苦痛定

則知痛人前倦談笑寂處成醉夢

九解

眠食頓

減憊甚尫厭厭一息僅在牀姊妹代澣沐始見

在臂腕口一巨創血肉尙狼藉筋骨大倔強膚

革焦爛多黑黃斑斑爛爛羅衣裳臧獲奔告相

驚惶郎來視之雙淚汪乃知前夕之夕服此湯

今日之日更無續命方雖復割臂難爲償紅顏

詩七

聖

少婦爲誰死男兒能勿摧肝腸

十解

郎心姑勿

悲妾病殆不起妾有一言告夫子人生偕老雖
百年斷無一日同死理妾之先郎行妾命自短
耳割臂世常有願妾獨至此即無割臂事時至
妾亦死郎生長未央妾死樂爲鬼更願黃泉相
見遲從此妾心大歡喜

十一解

乙酉上元時寓滬上

海上方多事新年又上元煙花六街滿兒女萬
家喧作客無佳節憂時有罪言餘生衰病甚何
處問桃源

秋蟬吟館詩鈔卷七終

跋

近人之言詩者亟稱鄭子尹鄭子尹子尹蓋頗
經喪亂其託意命詞又合少陵次山昌黎鎔鑄
而變化之故不同乎尋常之爲詩也上元金君
仍珠以其

尊人亞匏先生遺詩刊本見惠讀之彷彿向者
之讀子尹之詩也至癸丑甲寅間作則一種沈
痛慘澹陰黑氣象非子尹之詩所有矣夫舉家
陷身豺虎之穴謀與官軍應不濟萬死一生遲
之又久僅而次第得脫豈獨子尹所未經抑少

陵所未經矣經此危苦而不死豈乏其人不死而又能詩且能爲沈痛慘澹陰黑逼肖此危苦之詩無其人也先生與子尹同時子尹名早著然知子尹之詩不知先生之詩欲不謂之貴耳而賤目也豈可得邪乙卯人日侯官陳衍書于

京師

謹案

先君詩集粵匪亂後所作自題曰秋螻

吟館詩鈔捐館以後丹陽東季符先生

九泰垂

念金石至契力圖傳播屬仁和譚仲脩先生

獻

選成一本於光緒戊辰序刊杭州用

先君自

署詞稿之名題曰來雲閣詩板存金陵書局經

辛亥癸丑兩次兵事不可蹤跡嗣

還

與家兄

遺

商定仍用秋螻吟館詩鈔舊題覆印東本加入

詞稿文稿以活字板排行以餉世之欲讀先人

遺著者時與新會梁任公

啟超

同客京師承於

先集有詩史之目詳加釐訂復以紀事鉅篇譚

選尙有未盡加入數首屬

還

付手民精刻并許

刻後覆勘會梁君南返不果

還

敬檢手稿及束

本校讀并就仁和吳伯宛

昌綬

長洲章式之

一再商榷是爲今七卷本告成有日用志顛末

丙辰五月第二男還敬記